

尊德性齋小集

附補遺



2124
1
51996

尊德性齋小集

附補遺

程
洵
撰

中
華
書
局

叢書集成初編

尊德性齋小集 附補遺

中華書局 出版發行

(北京王府井大街三十六號)

秦皇島市資料印刷廠印刷

一九九一年北京第一版

開本：七八七乘一〇九二毫米三十二分之一

統一書號：ISBN7-101-00894-1/K·367

此據知不足齋叢
書本排印初編各
叢書僅有此本

程集序

程何。宋錄事參軍。蔡允夫氏也。集何。爲詩也。文也。詩何。爲四言一。爲五言古二十有六。爲七言古十有五。爲五言絕五。爲七言絕三十有三。爲五言律二。爲七言律三十有九。文何。爲劄子十有七。爲表十有一。爲啓二十有七。爲書二。爲序二。爲記三。爲銘二。爲跋四。爲行狀三。爲墓表一。爲祭文一。合而爲卷三。爲冊一也。曰尊德性何。重其集也。重其集何。重其人也。何重其人也。宋至中葉。傳斯道者。新安朱子也。允夫爲之內弟。師焉。自名其居曰道問學。學於道矣。朱子命之曰尊德性。傳以道也。夫朱子之道。聞諸濂洛。濂洛聞諸洙泗。遠矣。允夫聞於朱子。問學是道德性。是尊文以發之。詩以宣之。本末具焉。是故重之。重其聞道也。裔孫地官仲朴。獲敝簡於伯考。校諸聞友而授之梓焉。於惟重哉。學以聞道。程之曾孫念哉。詩曰。以似以續。續古之人。

嘉靖十年辛卯夏五月朔。通議大夫都察院右副都御史總督漕運前進士大庾劉節。

克庵先生尊德性齋小集序

自元和間。蘇氏有戲伊川程氏之語。門人怨怒。力排蘇氏。由是學者黨分。川洛朔。門者非之。紹興甲寅。予自湘中來歸廬陵。有錄事參軍婺源程洵允夫。袖長書及所業一通相過。合蘇程爲一家。心竊異之。已乃知其於朱熹元晦爲中表。自其先世相與講學。又酷嗜眉山山之文。爲三蘇紀年十卷。間以示予。其於蘇氏父子出處詩文先後。前輩議論之所及。編纂略盡。未幾。洵以病卒於官。後四年。其宗人法曹萬里出君尊德性齋小集一編。今古律詩百餘篇。記序書銘各二。跋四。說一。誌表行狀祭文八。敘事劄子五。啓五十一。大抵議論平正。辭氣和粹。蓋嘗記其師里人李縉之言曰。道有遠近。學無止法。不可見其近而自止。必造深遠而後有成。此程氏學也。又曰。文以載道。物有是理。辭者達是理而已。此蘇氏學也。君之所傳。實本於縉。學者果可無淵源乎。惜夫久困場屋。五十由累舉入官。主簿衡陽。一轉而止。不得發聞於世。予故序其書以告來者。少傳觀文殿大學士致仕益國公食邑一萬二千六百戶。實封四千六百戶。廬陵周必大序。克庵先生程公之文。簡而深。粹而雅。優游恬淡而無畢露之華。蓋其淵源之出。有自來矣。周益公朱文公文章道業。足以增重九鼎。而公皆得以親友之。則其他槩可知矣。昔東坡論文云。山川之有雲。草木之有華實。充滿勃鬱而見於外。雖欲無有。可得耶。僕謂公之文亦然。世有先後。不能親公生前。而讀公之文於沒後。三款之餘。敬書其編後云。宣教郎知徽州婺源縣事莆田方直孺序。

予與程君允夫居同邑。學同術。允夫在輩流中。籍籍有聲。而予出處差池。未之識也。及隨牒宦游。始邂逅於廬陵。見其說經史。論古今。聲聲令人屬耳。不厭於是。始恨相識之晚。允夫亦爲予傾倒底裏。過於舊交。予自清江秩滿。入中都爲博士。久不聞問。因詢鄉人之來者。則允夫已捐館舍矣。又四年。予始來歸。其壻黃君昭遠集允夫所著詩文屬予序。讀之終篇。大抵理勝而詞彩附之。陶鍊躡括。俱不苟作。蓋允夫早名薦書。晚綴仕籍。素所蘊蓄。不獲見事業。而惟寓於其文。故所成就如此。此足爲不朽計。遊於地下。無憾矣。昔者先友竹溪居士張公公予。嘗爲予言。爲文猶之善釀。稻秫必時。麴蘖必齊。水泉必香。投於一器。既熟。去其糟粕。沈濁在下。菁華在上。其色澄清。其氣芬郁。其味醇旨。此良醞也。惟文亦然。讀允夫之文者。當以是觀之。著作郎軍器少監奉祠雙溪王炎序。

敘

資謹按。先錄參克庵先生諱洵。字允夫。與晦庵子朱子爲內外兄弟。師事之。嘗以道問學名齋。晦庵爲易以尊德性而爲之銘。先生式敬承之。無怠。齋故有集。與凡所著。咸逸莫傳。宏治中。先伯父東軒府君有慨乎此。特汲汲焉。乃獲是集。敵稿一於從兄仲松所。楮蠹墨淪。代遠僅存。府君喜弗勝。以屬予小子。資曰。謹藏之。資唯唯。越如千年。則以質於先友。龜山梅君爲補其脫者八。訂其譌者十。約而爲卷者三。曰。盡梓諸資唯唯。則奉以周旋於甌越之閒。又如千年。至是始克就梓。資迺載拜稽首而言曰。是維吾先世箕裘之舊也。是維大儒晦庵子朱子之門高足弟子也。其所爲文。豈資所敢知哉。蓋嘗考之。維我先錄參先生初見晦庵。以詩文求教。而晦庵所以語之者。聖賢大學之道。居敬窮理之要。反躬踐履之實。至是復以尊德性之懿告之。其言曰。維皇上帝。降衷於民。何以予之。曰。義與仁。又曰。執玉捧盈。須臾顛沛。任重道悠。其敢或怠。夫孔門教不躐等。真積力久。一貫斯傳。性與天道。非晚年不與聞。晦庵之教。家法孔氏。曾是而驟語耶。然則先生之所謂文。豈資所敢知哉。雖然。竊有感焉。昔者我夫子刪述之大論著之詳。門弟子宜無弗記矣。而中庸一篇。猶有缺乎其孫而後傳。昌黎韓愈氏之文。陳言務去。八代爲起。宜亟傳矣。何自唐迄宋。中隔五季。乃與歐文忠公遙遙相遇於異世之下。先生生有宋盛時。下距故元。以迫於今三百餘年。而使晦者以顯。逸者以傳。東軒龜山二君子之功。顧可泯歟。其所未傳。庸非

我後人之責歟。傳曰。莫爲之前。雖美曷彰。莫爲之後。雖盛曷傳。資於是乎有深感矣。東軒府君諱孟河。字德潤。博雅能文。克世其家。蓋嘗螟祝乎資。而今自有後矣。龜山諱鶚。字幼和。宣城人。與資同學正德丁丑。舒芬榜進士。

嘉靖庚寅長至前五日。裔從孫資百拜敬書於金陵之鳳凰臺。

克庵先生尊德性齋小集卷之一

榮本和陶靖節韻

我卜我居游息在茲。有榮者木。日封殖之。本根既固。發生以時。我時傾瞻。中心慨而維人之生。孰本孰根。惟皇降衷。天理具存。是曰成性。道義之門。欽斯承斯。大化以敦。嗟彼世人。自安淺陋。德不圖新。惡或念舊。有干惟祿。有覬惟富。孰能毅然。不爲利疚。我懷師訓。罔敢失墜。匪道曷從。匪義曷畏。聖門雖遠。率焉以冀。庶幾疲駑。久亦告至。

按家藏錄本。榮木篇下別有二詩并題。俱蓋歛不可辨認。不得已節而去之。後凡殘缺處皆然。

張允迪出示方清老詩用韻簡之

十里五里聊幽尋。遠山近山相對陰。煙雲變態晚逾好。竹樹蔥蒼秋未深。故人見我喜欲舞。倚杖共看鴉投林。呼兒秉燭語清夜。炯炯君應識此心。

度黃瓜嶺

十年來往黃瓜路。冒日衝風凌雨霧。今朝短策又披雲。一笑成詩復悽楚。我行對鏡并浮鱗。欲學星斗變蒼穹。黃瓜雖小亦其亞。領略鱗鱗千萬峰。

次方唐卿對月見寄

芒屨卻走荒山道。始覺在家貧亦好。歸來對月思故人。寂寞柴門迹如掃。故人遺我新詩章。反覆幽懷欲傾倒。恍如明月墜我室。炯炯清光滿懷抱。祇今秋稼已如雲。飽意可緩憂心掣。潑醅酒熟君不來。遠思縣縣滿秋草。

張衡山南山瑞芝

君不見商山昔有龐眉叟。道德高風聳山斗。茹芝歲久得長年。身與此山俱不朽。張公道與此老同。失身偶墜世網中。卻從神武挂簪紱。林泉歲晚殊從容。壽宮誰遣芝生柱。三秀煌煌照庭宇。平生心地只天知。天道芝爲靈府助。商山之老長茹芝。公雖不茹亦不疑。商山南山兩不朽。公壽定應山與齊。

伯羽許見過雨不果

結廬在溪上。觸目皆可娛。嗟予亦何爲。悠悠事征途。鄉閭駕言歸。計日抵舊廬。春風百花老。遶屋桑柘疎。念無肯來人。門庭日荒蕪。之子獨有期。猶以雨意拘。人生感離合。惡懷固難舒。寄言我懷人。念我當焉如。度鳳凰嶺次董叔重韻

丫頭巖用前韻

側看初成峯。橫看復成嶺。何年古仙人。飛步緩梅云：緩當作凌。絕頂。至今兩鬢丫。縹緲煙霞冷。安步梅云：步當作得。荒遐。長嘯清夜永。

用前韻入閩

風雪武夷溪。乍阿還復嶺。依依鴉共林。片片雲摩頂。山中有高士。紙帳梅花冷。相期從此翁。昭語冬夜永。

用前韻懷兄晦翁

人皆樂夷塗。而憚陟崖嶺。不折彭澤腰。卽摩墨氏頂。誰能如此翁。獨臥滄波冷。寂寞詩書林。優游歲年永。

同正思叔重發潭溪度梅嶺用前韻

山行已淒迷。而況步脩嶺。飛仙不可見。誰復撫我頂。懷人雲嶠長。倦憩石磴冷。樵斧忽丁丁。彌覺清晝永。

汪節夫解官東歸賦此贈行

積潦卷洪落。秋容媚郊垌。登高望長陌。念君將有行。君生盛德後。家世多簪纓。尙書望最重。當代推名卿。幾年臥東山。屬望勞蒼生。天亦陰相之。芝蘭滿階庭。君子尤可人。少日負俊聲。曼倩聊玩世。子真豈求名。一官姑自慰。三歲俄終更。我從韓溪來。挽袂仍班荆。殷勤故舊意。丁寧離別情。聖門雖高遠。心地當恢宏。篤敬已可克。致知義方精。造次勤鑽仰。從容自規繩。他時立朝右。風節彌堅貞。江湖秋多風。歸途眼增明。引首看高舉。毋辭事遐征。

初發豫章

昨日苦暖今日寒。樹頭浙浙風聲乾。舟師祭罷喜風便。呼兒理楫高挂帆。孤舟一葉去如舞。白浪翻空作飛雨。爾曹醉膽何大耶。胡不江雲占砲車。

夜泊華家埠

江涵寒月明。人掩孤篷臥。蕭蕭木末風。驚我幽夢破。心閑萬念寂。枕穩千波妥。時聞掠水聲。知有魚舠過。

初泛湘江

昔聞瀟湘好。今作瀟湘遊。雨餘萬籟息。夷猶任輕舟。黯黯雲幕垂。漂漂浪花浮。故人在何許。悵望心悠悠。

送楊文父還醴陵

君家江西我江東。相望雖遠聲氣同。一行作吏湖湘上。數面成親談笑中。君思松竹行色動。我困簿領蜚塵蒙。他時登高倘有賦。莫望梅云。望當作忘。江頭回鴈峰。

送陳求仁還永嘉兼寄劉孝移

往年予梅云。疑作館。祁山丞。坐上屢聞君姓名。那知流落天一角。一笑共挹湘江清。地縣賦急員羞具。黃髮遐軌空馳溯。催科撫字兩勤勞。古道羨君今獨步。未陽之水化理滯。未陽之人何于于。疎梧細柳白日淨。唯有聲氣與君俱。君今快展摩天翮。會看赤手扶羲御。煙波渺渺正愁予。萬里瀟湘未歸去。河陽當日桃花紅。主人好客樽不空。相逢倘問衡陽簿。爲說年來憔悴容。

次韻趙祖德送李衡陽有感

秋日曬古城。秋風來水鄉。臨流送歸客。離思飛雲揚。銀液深蘸甲。金釵儼分行。祖行禮雖微。善頌意則良。破涕忽成笑。欲語旋復忘。若人工涉世。止沸非揚湯。俛首是非海。如居清淨坊。一朝脫屣去。翩如鴈隨陽。

三折僅存臂，九回無復腸。所欣返全璧，詎復變焚岡。我本山林人，才非錐處囊。偶然踏朝市，包以冠與裳。誰吹鄭子律，自分冰氏涼。餘習但文字，殘星弄微芒。來時岸柳綠，倏見秋葉黃。何當首歸途，解此名利韁。湖山足佳處，與君共徜徉。

趙詩云：終當計勇決。湖山足徜徉。

謁杜子美祠

少年讀公詩，諷詠忘日夕。晚爲湖外遊，適有耒陽役。仙人梅子真，邀我連轡策。蒼山環古城，幽路轉石壁。叢祠隱木末，古冢蟄道側。衣冠尙唐制，金石存古刻。緬懷天寶年，綱紀絲棼劇。肅代雖中興，安史互攘賊。風雲暗宇宙，她豕莽區域。生靈困魚爛，廊廟鄙肉食。崎嶇兵戎間，公亦屢顛路。時危孰與持，忠憤氣彌激。炯炯心懷丹，蕭蕭髮垂白。興來謾吟哦，賦罷還歎息。區區杞人憂，此意誰復測。至今杜陵編，義與風雅敵。人亡遺像在，廟古爐香寂。庭花日日紅，塔草年年碧。公身不可見，公心猶可識。惟餘耒陽流，與君共無極。

潘提刑生日四首用以介眉壽爲韻

泉以沙故渾，草以風故靡。誰能表獨出，屹若柱立砥。先生抱懿德，取喻當奚以。孤高衡嶽松，清潤湘江水。華堂敞千楹，居者嫌陋隘。安知閭扉中，蟻蠹生桎械。先生處囚時，矜測逮鮮介。此心卽天心，不爲門閭大。天心本廣大，有外寧合之。咄哉客驕者，妄自分町畦。先生克己學，不起一念私。斯道愈光新，渠用夸揚眉。賢者必得貴，仁者必得壽。天人何閒然，如契鑰相受。先生邁種德，無覲報自厚。應笑昌黎翁，區區說南斗。

遊獅子巖

南州風氣殊。二月若中夏。我從未江來。無地稅征徭。繁紆躡薜徑。問訊得精舍。石崖屹傍起。峭壁巖難跨。嵌巖忽中間。宛宛如覆瓦。日光何處來。返照幽以雅。獅狔踞其勇。踞坐頤頰哆。欲爲河東吼。解使百獸啞。應是山靈護。豈容俗人假。茲遊真勝絕。欲去重嗟咤。老僧勸少留。秉燭語清夜。那知巖伏情。眺玩不可舍。他年倘復來。陳迹猶可藉。巖前有隙地。分我茅一把。

游浯溪用張宛邱韻

六合塵昏誰汛掃。秦王功業成橫草。後裔居安不慮危。欲向溫柔鄉裏老。漁陽金鼓動地來。羯胡本非劉石才。若爲二十四郡守。如振稿葉彈浮埃。皇天悔禍見星紀。太白八月胡當死。英英李郭爲時生。濟世何須識丁字。祇災已去瑞慶來。何人大筆書丹崖。南口猶自頌聲作。中天想見氛祲開。遺文三復堪悲慨。興廢渾如目前在。咄哉誤國高將軍。猶歎兩京作斤賣。

遊東安五峯閣凜然亭

穹林擁精廬。奇石林端起。玲瓏蛟兔穴。編綴東方齒。我峩倚高寒。落落負壯偉。何人昔好事。誅殲發天闕。傑閣冠其顛。幽亭踞其趾。五峯天際來。縱與供燕几。吾聞零陵郡。地蘊清淑氣。法當產瑰奇。鍾秀乃在此。何當蠟吾屐。盡攬入胸次。融成九華詩。寫作菱溪記。卻笑奇章公。班班刻名字。

過愚溪登愚亭拜柳子厚像

我從來陽來。已拜杜陵墓。今行湘水湄。復識愚溪路。茲遊豈無益。登覽屢弔古。明日理扁舟。又向浯溪去。

薛使君生日

春來一雨不終日。處處野田龜兆坼。使君閔雨雨應期。插水新秧綠如織。人言秧好歲定豐。民感使君慈父同。生朝共上千歲壽。酒酌流霞花裊紅。使君爲德豈但此。念念愛民如愛子。陰功無數只天知。報以長年固其理。青衫短簿人莫知。索米不充方朔饑。香山松鶴舉無有。但采民言成頌詩。

東坡詩。圖爲東坡詩。

次韻劉子厚人日立春

流光馳兔烏。弱質感蒲柳。新年有樂事。菜羹侑甘酒。歲時記。人曰。煮七葉菜羹。楚俗本自佳。顏巷敢嫌陋。陶然爲一醉。闊步無何有。畫屏貼綵人。赤牛負土偶。誰能效兒童。翦飾較妍醜。城南有佳士。避世不回首。詩成試問之。如此近道否。鈍根君勿嗤。著語不敢苟。

劉寺簿所居五詠

墨莊

先生耕道時。萬卷皆其具。藏晚德已豐。萬卷猶如故。

洌軒

理髡完新髻。披沙挹舊清。一瓢遺味在。雋永若爲名。

靜春堂

氛埃痛掃溉。鄰里謝將迎。默坐無餘念。欣欣物自榮。

玩易齋

萬變本六畫。六畫來何從。此理須玩索。明窗露未濃。

君子亭

食藕痊沈痾。製荷被吾體。未如對芳華。幽貞似君子。

次韻劉寺簿暇日出郊按視貢院安養院漏澤園南教場飯於花藥寺用韋蘇州韻賦詩

使君抱孤韻。勝日成獨遊。聊循七里郭。一賞千林秋。射圃旣徘徊。澤宮重咨時。孰生病我瘵。孰死骨我收。遐觀興未窮。小憩山更幽。昔人事登覽。不憚道里悠。而我縛微官。抗塵苦淹留。何當奉杖屨。崇論排田疇。

余季行肯堂

天地有常運。成功須四時。斂藏苟不至。生養猶浪施。而況結夏屋。豈伊一人爲。向非來耆賢。俯仰成棄基。余氏本望族。舊業祖所貽。流光被累葉。衍也復嗣之。華堂小荒菲。新築供輩飛。老木傲風煙。脩篁拂雲霓。連峯累奇石。一鏡開清池。窗閒編簡橫。門外塵鞅希。封胡幾男子。晨夕相追隨。步趨朱與張。談笑書與詩。寧復綺紈習。所期君子歸。青桐韓家樹。丹桂竇氏枝。它年定儷美。吾言豈君欺。

次韻張順之見寄

詩翁老去百年灰。梅云。年灰當作年木。禪語也。山谷好用之。皮膚剝落眞實在。誅茅築室傍幽林。泉石煙雲動光彩。酸寒不作